

**BOSNA I HERCEGOVINA**  
**Agencija za razvoj**  
**visokog obrazovanja i**  
**osiguranje**  
**kvaliteta/kvalitete**  
**Banja Luka**



**БОСНА И**  
**ХЕРЦЕГОВИНА**  
**Агенција за развој**  
**високог образовања и**  
**обезбјеђивање**  
**квалитета**  
**Бања Лука**

**Agency for Development of Higher Education and Quality**  
**Assurance**

**STATUT**  
**AGENCIJE ZA RAZVOJ VISOKOG OBRAZOVANJA I OSIGURANJE**  
**KVALITETA**

Banja Luka, oktobar 2009. godine

Na osnovu člana 51. stav 2. Okvirnog zakona o visokom obrazovanju u Bosni i Hercegovini ("Službeni glasnik BiH", broj 59/07 i 59/09), Upravni odbor Agencije za razvoj visokog obrazovanja i osiguranje kvaliteta na 5. sjednici održanoj 5. oktobra 2009. godine u Mostaru uz prethodnu saglasnost Vijeća ministara Bosne i Hercegovine datoj na 91. sjednici od 19. juna 2009. godine, donosi

## **STATUT AGENCIJE ZA RAZVOJ VISOKOG OBRAZOVANJA I OSIGURANJE KVALITETA**

### **I OPĆE I STATUSNE ODREDBE**

#### **Član 1. (Predmet)**

Statutom Agencije za razvoj visokog obrazovanja i osiguranje kvaliteta (u daljem tekstu: Agencija) uređuju se sljedeća pitanja značajna za rad i poslovanje Agencije:

- a) naziv Agencije;
- b) sjedište Agencije;
- c) nadležnosti Agencije;
- d) način upravljanja i rukovođenja Agencijom;
- e) organi i tijela Agencije;
- f) financiranje Agencije;
- g) program i planiranje rada Agencije;
- h) javnost rada Agencije;
- i) način izmjena i dopuna Statuta Agencije;

j) ostala pitanja značajna za rad Agencije.

## **Član 2. (Osnivanje Agencije)**

(1) Agencija je osnovana članom 47. Okvirnog zakona o visokom obrazovanju u Bosni i Hercegovini ("Službeni glasnik BiH", broj 59/07).

(2) Odlukom o početku rada i utvrđivanju sjedišta Agencije za razvoj visokog obrazovanja i osiguranje kvaliteta ("Službeni glasnik BiH" broj 10/08) Vijeće ministara Bosne i Hercegovine (u daljem tekstu: Vijeće ministara) odredilo je početak rada i sjedište Agencije.

(3) Agencija za razvoj visokog obrazovanja i osiguranje kvaliteta je samostalna upravna organizacija sa pravima i obavezama propisanim Okvirnim zakonom o visokom obrazovanju u Bosni i Hercegovini.

(4) U aktivnostima vanjskog osiguranja kvaliteta Agencija djeluje nezavisno u okviru svojih nadležnosti.

## **II NAZIV I SJEDIŠTE AGENCIJE**

### **Član 3. (Naziv Agencije)**

(1) Agencija posluje pod nazivom Agencija za razvoj visokog obrazovanja i osiguranje kvaliteta.

(2) Naziv Agencije na engleskom jeziku je Agency for Development of Higher Education and Quality Assurance.

(3) Skraćeni naziv Agencije je na službenim jezicima u Bosni i Hercegovini AVO i na engleskom jeziku HEA.

### **Član 4. (Sjedište Agencije)**

(1) Sjedište Agencije je u Banjoj Luci.

(2) Agencija poslove iz svoje nadležnosti obavlja na cijelom prostoru Bosne i Hercegovine, a radi osiguranja pune efikasnosti, operativnosti i racionalnosti saraduje sa nadležnim obrazovnim vlastima i

predstavnicima akademske zajednice i međunarodnih organizacija u BiH.

### **Član 5. (Pečat Agencije)**

- (1) Agencija ima pečat okruglog oblika promjera 50 i 20 milimetara.
- (2) Ako Agencija koristi više pečata istog promjera, svaki od tih pečata mora biti označen rednim brojem.
- (3) Agencija ima štambilj koji služi za unutarnje uredsko poslovanje.
- (4) Sadržaj pečata, način čuvanja i upotrebe regulisaće se u skladu sa Zakonom o pečatu institucija Bosne i Hercegovine ("Službeni glasnik BiH", broj 12/98 i 14/03).

### **III NADLEŽNOST AGENCIJE**

#### **Član 6. (Nadležnost)**

Agencija je nadležna za:

- a) utvrđivanje jasnih, transparentnih i pristupačnih kriterija za akreditaciju visokoškolskih ustanova i studijskih programa prvog, drugog i trećeg ciklusa i donošenje normi kojima se određuju minimalni standardi u oblasti visokog obrazovanja;
- b) davanje preporuka o kriterijima i standardima ministarstvu Republike Srpske, kantonalnim ministarstvima i Brčko distriktu BiH za osnivanje i zatvaranje visokoškolskih ustanova, te za prestrukturiranje studijskih programa;
- c) davanje preporuka o kriterijima za licenciranje visokoškolskih ustanova i studijskih programa;
- d) davanje preporuke o najnižim školarinama za sve studente na akreditiranim visokoškolskim ustanovama, s ciljem usklađivanja najnižih školarina na cijeloj teritoriji Bosne i Hercegovine;
- e) davanje savjeta o politici rada i razvoja ministarstvu Republike Srpske, kantonalnim ministarstvima i Brčko distriktu BiH;

- f) davanje savjeta i informacija o pitanjima iz svoje nadležnosti zainteresiranim strankama;
- g) utvrđivanje standarda kvaliteta, analizu kvaliteta, davanje preporuka za otklanjanje nedostataka kvaliteta studija i visokoškolskih ustanova;
- h) predstavljanje Bosne i Hercegovine u međunarodnim organizacijama za kvalitet u visokom obrazovanju;
- i) predlaganje općih smjernica i kriterija na osnovu kojih se iz budžeta institucija BiH mogu dodjeljivati sredstva visokoškolskim ustanovama za naučnoistraživački rad;
- j) donošenje uputstva o formi i sadržaju diplome i dodatka diplomi koju izdaju akreditirane visokoškolske ustanove;
- k) donošenje pravilnika i drugih akata iz svoje nadležnosti.

## **Član 7. (Akreditacija)**

U oblasti akreditacije, Agencija je nadležna za:

- a) utvrđivanje kriterija za izbor domaćih i međunarodnih stručnjaka koji daju ocjenu i obavljaju reviziju kvaliteta i daju preporuke o akreditaciji visokoškolskih ustanova;
- b) raspisivanje javnog konkursa za izbor domaćih i međunarodnih stručnjaka za ocjenjivanje i reviziju kvaliteta i davanje preporuka o akreditaciji visokoškolskih ustanova, odnosno njihovih studijskih programa (u daljem tekstu: stručnjaci);
- c) osnivanje komisije za utvrđivanje liste stručnjaka, koja ima pet članova, a čini je po jedan predstavnik Rektorske konferencije, jednog kantonalnog ministarstva, ministarstva Republike Srpske, Brčko distrikta BiH, te predstavnik Agencije;
- d) dostavljanje utvrđene liste stručnjaka na usvajanje svim ministarstvima obrazovanja u BiH i nadležnom odjelu Brčko distrikta BiH;
- e) imenovanje komisije stručnjaka, na osnovu prijedloga nadležnih obrazovnih vlasti u pogledu izbora stručnjaka s utvrđene liste stručnjaka;

f) davanje preporuke nadležnim obrazovnim vlastima o akreditaciji visokoškolske ustanove, odnosno studijskog programa, na osnovu mišljenja komisije stručnjaka;

g) postupak i rješenje o akreditaciji i licenciranju visokoškolskih ustanova koje donose ministarstvo Republike Srpske, kantonalna ministarstva i Brčko distrikt BiH;

h) ocjenjivanje usklađenosti rješenja o akreditaciji s normama i kriterijima iz člana 6. tačka a) ovog statuta i, u slučaju utvrđene neusklađenosti, davanje preporuke Upravnom odboru za preduzimanje daljih mjera, sve do mjere poništenja rješenja o akreditaciji. Žalbu na rješenje o poništenju rješenja o akreditaciji nadležne obrazovne vlasti podnose Upravnom odboru Agencije;

i) vođenje državnog registra akreditiranih visokoškolskih ustanova;

j) stalnu dostupnost na svojoj internet stranici liste akreditiranih visokoškolskih ustanova u Bosni i Hercegovini i njeno objavljivanje najmanje jednom godišnje u "Službenom glasniku BiH", a najmanje dva puta godišnje u trima visokotiražnim dnevnim novinama.

#### **IV ORGANI AGENCIJE, UPRAVLJANJE I RUKOVOĐENJE**

##### **Član 8. (Organi Agencije)**

Organi Agencije su:

a) Upravni odbor i

b) Direktor.

##### **Član 9. (Upravni odbor)**

(1) Agencijom upravlja Upravni odbor koji ima deset članova.

(2) Upravni odbor čine po tri člana iz sva tri konstitutivna naroda i jedan član iz reda ostalih.

(3) Upravni odbor čini najmanje 50% redovnih profesora univerziteta.

(4) Upravni odbor ima predsjednika i dva potpredsjednika.

(5) Predsjednik i potpredsjednici Upravnog odbora nisu iz istog konstitutivnog naroda.

(6) Upravni odbor odlučuje većinom glasova od ukupnog broja članova pod uvjetom da takvu većinu čine najmanje dvije trećine glasova predstavnika svakog konstitutivnog naroda.

(7) Upravni odbor će donijeti Poslovnik o radu kojim će se regulisati način rada, mandatni period predsjednika i potpredsjednika i ostala pitanja u provođenju nadležnosti Upravnog odbora.

### **Član 10. (Izbor članova Upravnog odbora)**

(1) Članove Upravnog odbora Agencije bira Parlamentarna skupština Bosne i Hercegovine na mandat od tri godine s mogućnošću reizbora, pod uvjetom da se inicijalno imenovanje provede u fazama, tako da svake godine jedna trećina članova bude reizborna ili ponovo imenovana.

(2) Za člana Upravnog odbora može biti imenovana osoba koja pored općih uvjeta mora ispunjavati i sljedeće posebne uvjete:

a) za najmanje pet članova Upravnog odbora Agencije uvjet je visoka stručna sprema (VII stepen obrazovanja) – akademsko zvanje redovnog profesora univerziteta;

b) znanje engleskog jezika;

c) iskustvo u aktivnostima europskog područja visokog obrazovanja, posebno europskih standarda za ocjenu i reviziju kvaliteta i planiranja razvoja visokog obrazovanja;

d) iskustvo u reformi sistema visokog obrazovanja u BiH.

(3) Upravni odbor Agencije dužan je šest mjeseci prije isteka mandata člana Upravnog odbora Agencije o isteku mandata toga člana Upravnog odbora Agencije obavijestiti Parlamentarnu skupštinu Bosne i Hercegovine i zatražiti provođenje procedura za izbor i imenovanje novog člana Upravnog odbora Agencije.

(4) Član Upravnog odbora po isteku mandatnog razdoblja napušta dužnost člana (predsjednika ili potpredsjednika) Upravnog odbora tek nakon što se na tu poziciju obavi konačno imenovanje novoga člana.

(5) Predsjednik, potpredsjednici i članovi Upravnog odbora, kada sudjeluju u radu Upravnog odbora van svog mjesta prebivališta, imaju pravo na naknadu putnih troškova, i to troškova prevoza upotrebom vlastitog putničkog motornog vozila u službene svrhe, dnevnice i hotelskog smještaja.

(6) Naknade se isplaćuju iz sredstava Agencije, a u skladu sa odobrenim i raspoloživim budžetom.

### **Član 11. (Sjednice Upravnog odbora)**

(1) Sjednice Upravnog odbora saziva predsjednik Upravnog odbora.

(2) Sjednice Upravnog odbora se u pravilu održavaju u sjedištu Agencije. Međutim, Upravni odbor može donijeti odluku da se sjednica Upravnog odbora održi i na drugom mjestu, naročito kad je to u funkciji ostvarivanja bolje saradnje s akademskom zajednicom.

(3) Predsjednik Upravnog odbora je dužan zakazati sjednicu na zahtjev direktora Agencije, zamjenika direktora u slučaju odsutnosti direktora ili na zajednički zahtjev najmanje dva člana Upravnog odbora.

(4) Upravni odbor odlučuje većinom glasova od ukupnog broja članova pod uvjetom da takvu većinu čine najmanje dvije trećine glasova predstavnika svakog konstitutivnog naroda.

### **Član 12. (Nadležnosti Upravnog odbora)**

Nadležnosti Upravnog odbora Agencije su sljedeće:

a) donosi Statut Agencije i dostavlja ga Vijeću ministara na saglasnost;

b) daje saglasnost na pravilnike koje predlaže Agencija iz svojih nadležnosti u razvoju visokog obrazovanja i osiguranja kvaliteta definiranih u članovima 6. i 7. ovog statuta;



- c) obezbjeđuje da rad Agencije bude u skladu sa nadležnostima utvrđenim u Okvirnom zakonu o visokom obrazovanju u Bosni i Hercegovini;
- d) osigurava da rad Agencije bude u skladu sa politikama prioriteta Vijeća ministara i Parlamentarne skupštine Bosne i Hercegovine u reformi visokog obrazovanja u Bosni i Hercegovini i;
- e) usvaja Program rada Agencije za razdoblje naredne kalendarske godine, najkasnije do 31. januara tekuće godine, kojim se detaljno uređuju aktivnosti, poslovi i financiranje Agencije;
- f) nadzire provođenje programa rada Agencije;
- g) rješava žalbe na rješenje o poništenju rješenja o akreditaciji;
- h) određuje vrste usluga koje Agencija pruža uz nadoknadu i visinu nadoknade za pružene usluge;
- i) prije 31. marta svake godine usvaja izvještaj o radu Agencije u prethodnoj godini koji se dostavlja Vijeću ministara Bosne i Hercegovine;
- j) jednom godišnje pismeno izvještava Parlamentarnu skupštinu BiH o svom radu;
- k) obavlja i druge poslove u skladu sa Okvirnim zakonom o visokom obrazovanju i Statutom.

### **Član 13. (Rukovođenje Agencijom)**

- (1) Agencijom rukovodi direktor.
- (2) Direktor rukovodi Agencijom u saradnji sa zamjenicima direktora u skladu sa zakonima i podzakonskim aktima koji se odnose na rad organa uprave Bosne i Hercegovine, Pravilnikom o unutaršnjoj organizaciji i drugim aktima Agencije.
- (3) Saradnja iz prethodnog stava u pravilu se ostvaruje putem Stručnog kolegija Agencije, tijela koje se uspostavlja radi razmatranja strateških, načelnih i drugih pitanja iz nadležnosti Agencije i davanja mišljenja i prijedloga direktoru Agencije i Upravnom odboru.
- (4) Rad Stručnog kolegija uređuje se Poslovnikom o radu koji Stručni kolegij sam donosi.

**Član 14.**  
**(Zamjenik direktora)**

Zamjenik direktora Agencije zamjenjuje direktora u slučaju odsutnosti ili spriječenosti, obavlja poslove iz nadležnosti direktora, te druge poslove u skladu sa zakonom i aktima Agencije.

**Član 15.**  
**(Izbor i imenovanje rukovodstva)**

(1) Direktora i dva zamjenika direktora Agencije imenuje Vijeće ministara nakon provedenog javnog konkursa, u skladu sa Zakonom o ministarskim imenovanjima, imenovanjima Vijeća ministara i drugim imenovanjima Bosne i Hercegovine ("Službeni glasnik BiH", broj 37/03).

(2) Mandat direktora i njegovih zamjenika je četiri godine.

(3) Direktor i zamjenici direktora ne mogu biti iz istog konstitutivnog naroda.

**Član 16.**  
**(Uvjeti za izbor rukovodstva)**

Za direktora i zamjenike direktora može biti imenovana osoba koja pored općih uvjeta ispunjava i sljedeće posebne uvjete:

a) visoka stručna sprema (VII stepen obrazovanja) - prednost kvalifikacija drugog i trećeg ciklusa;

b) pet godina radnog iskustva u struci, od čega najmanje tri godine u oblasti visokog obrazovanja ili poslovima vezanim za oblast visokog obrazovanja;

c) iskustvo u strateškom i operativnom planiranju, menadžmentu ljudskim resursima i razvoju i obuci osoblja, finansijskom menadžmentu i menadžmentu projekata, informacija i podataka;

d) iskustvo u europskom području visokog obrazovanja, posebno europskih standarda za ocjenu i reviziju kvaliteta i planiranja razvoja visokog školstva;

- e) iskustvo u reformi sistema visokog obrazovanja u BiH;
- f) aktivno znanje engleskog jezika;
- g) posjedovanje dobrog standarda korištenja računara i IT komunikacija.

**Član 17.**  
**(Nadležnosti direktora Agencije)**

(1) Direktor Agencije:

- a) organizira i rukovodi radom i poslovanjem Agencije;
- b) zastupa i predstavlja Agenciju u zemlji i inostranstvu;
- c) odgovoran je za zakonitost rada Agencije;
- d) učestvuje u radu Upravnog odbora Agencije, bez prava glasa;
- e) donosi opća akta Agencije u skladu sa zakonom;
- f) predlaže Upravnom odboru na saglasnost pravilnike i druge akte iz nadležnosti Agencije;
- g) odlučuje o prijemu i raspoređivanju državnih službenika i zaposlenika na poslove i radne zadatke u skladu sa zakonom;
- h) izvještava Vijeće ministara i Upravni odbor o radu Agencije najmanje dva puta godišnje;
- i) obavlja i druge poslove propisane ovim statutom, Okvirnim zakonom o visokom obrazovanju i ostalim propisima.

(2) Direktor Agencije za svoj rad i rad Agencije odgovara Vijeću ministara i Upravnom odboru Agencije.

**Član 18.**  
**(Razrješenje rukovodstva)**

(1) Direktor i njegovi zamjenici mogu biti razriješeni i prije isteka mandata u slučajevima izazivanja ozbiljnih poremećaja u radu i poslovanju Agencije, u slučaju ostavke i u drugim slučajevima predviđenim odgovarajućim propisima.

(2) Odluku iz stava 1. ovog člana donosi Vijeće ministara.

### **Član 19. (Unutarnja organizacija)**

Unutarnja organizacija Agencije utvrđuje se Pravilnikom o unutarnjoj organizaciji Agencije koji donosi direktor Agencije uz saglasnost Vijeća ministara.

## **V FINANCIRANJE, PROGRAMIRANJE I PLANIRANJE RADA, JAVNOST RADA I ZASTUPANJE**

### **Član 20. (Financiranje Agencije)**

(1) Agencija se financira iz budžeta institucija BiH, iz vlastitih prihoda, donacija, međunarodnih projekata i drugih izvora.

(2) Financijskim sredstvima Agencije u skladu sa propisima raspolaže direktor Agencije.

(3) Upravni odbor Agencije će na prijedlog direktora donijeti odluku o tome koje će usluge Agencija pružati uz naknadu, a istom će utvrditi i visinu naknada.

(4) Upravni odbor Agencije na osnovu Programa rada predlaže financijski plan Agencije kojim se utvrđuje visina prihoda i rashoda za jednu proračunsku godinu.

(5) Upravni odbor Agencije će donijeti Pravilnik o upravljanju i načinu korištenja vlastitih prihoda Agencije uz saglasnost Vijeća ministara.

### **Član 21. (Planiranje i programiranje)**

(1) Agencija planira svoj rad i razvoj, srednjoročne programe razvoja i strateške projekcije razvoja.

(2) Direktor Agencije dužan je za svaku godinu predložiti program rada Agencije i podnijeti izvještaj o radu Agencije Upravnom odboru.

(3) Program rada i izvještaj o radu podnosi se Vijeću ministara.

## **Član 22. (Javnost rada)**

(1) Rad Agencije je dostupan javnosti.

(2) Javnost rada Agencije može se osigurati ili isključiti samo u skladu sa odredbama Zakona o slobodi pristupa informacijama u Bosni i Hercegovini ("Službeni glasnik BiH", broj 28/00 i 45/06).

## **Član 23. (Zastupanje)**

Agenciju zastupa i predstavlja direktor, a u odsutnosti direktora jedan od zamjenika direktora, po ovlaštenju direktora.

## **VI PRELAZNE I ZAVRŠNE ODREDBE**

### **Član 24. (Izmjene Statuta)**

(1) Statut Agencije mijenja se na način i prema postupku koji je propisan za njegovo donošenje.

(2) Inicijativu za izmjenu i dopunu Statuta daje direktor ili Upravni odbor Agencije.

### **Član 25. (Stupanje na snagu)**

Statut stupa na snagu danom donošenja.

**Član 26.**  
**(Objava)**

Statut Agencije objavljuje se u "Službenom glasniku Bosne i Hercegovine".

Broj: 01-50-725/09  
Datum: 5. oktobra 2009. godine

**Predsjednik Upravnog odbora**

**Prof. dr Mišo Kulić**

# **OBRAZLOŽENJE STATUTA AGENCIJE ZA RAZVOJ VISOKOG OBRAZOVANJA I OSIGURANJE KVALITETA**

## **I – PRAVNI OSNOV ZA DONOŠENJE STATUTA**

Pravni osnov za donošenje Statuta Agencije za razvoj visokog obrazovanja i osiguranje kvaliteta sadržan je u članu 51. Okvirnog zakona o visokom obrazovanju u Bosni i Hercegovini ("Službeni glasnik BiH" broj 59/07) u kojem je navedeno da se rad Agencije uređuje Statutom, a da saglasnost na Statut daje Vijeće ministara Bosne i Hercegovine.

## **II – RAZLOZI ZA DONOŠENJE STATUTA**

Donošenjem Okvirnog zakona o visokom obrazovanju u Bosni i Hercegovini ("Službeni glasnik BiH", broj 59/07) osnovana je Agencija za razvoj visokog obrazovanja i osiguranje kvaliteta, a Odlukom o početku rada i utvrđivanju sjedišta Agencije za razvoj visokog obrazovanja i osiguranje kvaliteta ("Službeni glasnik BiH", broj 10/08) utvrđeno je sjedište Agencije u Banjoj Luci i početak rada.

Na osnovu člana 51. stav 9. Okvirnog zakona o visokom obrazovanju u Bosni i Hercegovini ("Službeni glasnik BiH", broj 59/07), Parlamentarna skupština Bosne i Hercegovine, na 40. sjednici Predstavničkog doma, održanoj 19. novembra 2008. godine, i na 23. sjednici Doma naroda, održanoj 4. decembra 2008. godine, donijela je Odluku o izboru članova Upravnog odbora Agencije za razvoj visokog obrazovanja i osiguranje kvaliteta ("Službeni glasnik Bosne i Hercegovine", broj 100/08).

Upravni odbor Agencije za razvoj visokog obrazovanja i osiguranje kvaliteta je na četvrtoj sjednici održanoj 25. maja 2009. godine u Banjoj Luci utvrdio prijedlog Statuta koji se dostavlja Vijeću ministara na saglasnost.

## **III – OBRAZLOŽENJE PREDLOŽENIH RJEŠENJA**

Statutom se uređuju pitanja od značaja za naziv Agencije, sjedište i nadležnosti, nadležnosti u oblasti akreditacije, način upravljanja i rukovođenja Agencijom, načela unutarnje organizacije, organi i tijela Agencije, financiranje Agencije, program i planiranje rada, javnost rada, način izmjena i dopuna Statuta i ostala pitanja od značaja za rad Agencije.

#### **IV – POTREBNA FINANCIJSKA SREDSTVA**

Za provođenje ovog statuta osigurana su finansijska sredstva u budžetu institucija Bosne i Hercegovine i međunarodnih obaveza Bosne i Hercegovine za 2009. godinu. U skladu sa odobrenim sredstvima vršiće se postupna, planska i efikasna uspostava rada Agencije u 2009. godini.